


PS ()



GRAUN EM I AS BILONG TRABEL

Pipel long Rabaul na Bougainville na Hailans na Port Moresby na planti arapela distrik i save kros na pait long graun. Orait, nau gavman i bin makim wanpela lain lokal pipel stret bilong raun na stretim dispela ol wari na tok. Yu ken lukim ol memba hia i bilong kain kain distrik.

Minista bilong Graun, Mista Albert Maori Kiki i bin makim nupela komisin bilong stretim ol tok bilong graun long Papua Nu Gini.

Tenpela saveman bilong Papua Nu Gini bai wok long dispela komisin. Em hia nem bilong ol:

Mista Sinaka Goava, jas long lokal kot, em i siaman. Em i kam long

Sentral Distrik. Mista Posa Kilor em i Distrik Ofisa na i kam long Galp Distrik.

Mista Donigi Samiel, em i lokal gavman kaunsila bilong Is Sepik Distrik Pater Ignatius Kilage, katolik pris bilong Simbu Distrik.

Mista John Kup, bipo em i namba tu kiap; bilong Westen Hailans.

Mista ToBangolua bilong

Is Nu Briten Distrik. Mista Benny Woana, bilong Lae.

Mista Cletus Harepa, lokal gavman kaunsila bilong Bougainville.


Mista Haratius Igua, bilong Risev Beng long Rabaul; em i kam long Nu Ailan.

Mista Edric Eupu, presiden bilong Higaturu Lokal Gavman Kaunsil long Noten Distrik.

I gat sampela loman tu i sambailong ol.

Bai ol i raun long olgeta distrik na tok tok wantaim ol pipel long ol wari na trabel bilong graun.

DISPELA EM I BIKPELA SAMTING TRU, LONG WANEM AS BILONG PLANTI PAIT NA TRABEL EM GRAUN TA-SOL.




MISTA ALBERT MAORI KIKI

Man i laik autim sampela tok long graun o kisim save long ol lo bilong en, em i ken rait long:

Komisin Bilong Graun
P.O. Box 2459

Konedobu

Komisin hia i laik kisim tok bilong planti pipel.



Dispela man, Mista D.S. Grove, bipo em i dai- rekta bilong Dipatmen bilong Graun..Taim em i go pinis em i amamas tru long harim planti moa tok pisin long Haus Asembli. Em i tok dispela i gut tru tru. Nau ol man inap save long ol toktok.

Kisim Save Na Givim

Long dispela mun yet bai 8-pela lokal ofisa bilong Dipatmen bilong Infomesen o toksave i go long Australia long wanpela kos inap 10 mun bilong kisim olkain save long brotkas na long bosim ol wok bilong di-

patmen.

Mista Paulus Arek, Minista bilong dispela dipatmen i tokim ol: "Yupela i maus tru bilong Papua Nu Gini; yupela i tisa tru bilong olgeta pipel."

Long mun Mas bai narapela 20 manmeri i go skul long Australia.

Praim Minista Lukluk Raun

Praim Minista bilong Australia, Mista Gough Whitlam, i kam lukluk raun long Papua Nu Gini long Sande, namba 18 de bilong Februeri. Mista Morrison, minista bilong ol Teritori na Mista D. Hay - bipo em i edministreta bilong Papua Nu Gini-em tu i kam.

kantri bilong Asia.

Ol dispela bikpela man wantaim edministreta Mista Johnson bai i pati long Port Moresby.

Bihain, long Mande bai olgeta ol i flai i go long Goroka.

Long Tunde bai Mista Whitlam i flai i go long Indonesia. Na Mista Morrison bai go lukluk raun long Bougainville. Long Fonde bai ol i go lukim Rabaul.

Long dispela Sande yet Mista Somare i bin kam bek long lukluk raun bilong em long ol

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prininem nem bilong yu tru, orait yu raitim wanpela narapela nem bilong yu.

TENKYU LONG MISIN

Dia Edita.- Long radio Wewak nius 18 Janu-eri mi harim olsem Ambunti Lokal Gavman Kaunsil i tok olsem Katolik Sios i mekim planti bisnis na mekim profit long pulimapim poket bilong ol.

Ol i tok Katolik Misin i mekim planti stua tumas long pulim mani bilong ol pipel.

Nau mi gat liklik bekim long dispela samting. Namba wan samting long stua em bilong helpim ol pipel tasol. Planti ol pipel i save go longwe tumas long baim ol samting. Ol tretstua i stap tasol planti bilong ol i gat pis, rais, tasol nogat ol arapela samting.

Namba tu samting liklik profit ol i kisim em bilong helpim Misin long ranim stesin tasol. Hia mi gat sampela askim long ol pipel na Ambunti Kaunsil.

Yupela i ting Katolik Sios bai kisim mani long wanem hap long mekim wok? Yupela ting mipela i save helpim Katolik Misin na givim ol liklik mani long wok bilong ol? Inap long mipela i tokim ol, orait lusim ol bisnis bikos mipela yet i helpim yupela? Hamas pipel i save helpim Misin? Mi ting nogat tru, sampela o liklik man tasol Katolik Misin i save kisim mani we long wok long ol skul, ol haus sik, na planti ol sosal wok?

Mi ting Katolik Sios i no mekim ol haus sik bai planti manmeri i dai na pikinini i dai. Bipo planti pipel i dai tasol nau i no gat, bikos i gat haus sik. Hia long Ulupu eria mi lukim planti pipel i no dai moa, bikos ol sista hia i save wok hat tru na sevim planti man. Planti pikinini i save dai long malaria bipo tasol nau nogat planti.

Sapos Katolik Misin i no mekim skul bai planti bilong yumi i no gat edukesen.

Planti pikinini tru inap long stap long ples sapos Katolik Misin i no mekim ol skul.

Nau long dispela yia 1973 Katolik Sios i gat 48 praimer skul na 3-pela haiskul, na wanpela tisa koles. Nau yupela i ting wanem dispela i planti wok o i no gat?

Dispela liklik profit i no inap tru long mekim ol dispela wok. Ol pipel na ol pren bilong ol long arapela kantri i save helpim Katolik Sios moa yet. Mi yet mi bin lukim na painimaut olsem sapos ol arapela kantri i no helpim bai ol dispela, planti wok i pundaun.

Mipela ol pipel bilong Papua Nu Gini i save tok "TENKYU" long Katolik Misin na ol arapela o nogat sindaun na kros na painim rong long ol. Ating mipela mas mekim bikpela TENKYU na amamas long ol Misin na ol pren bilong ol long ol planti help ol i givim yumi.

Mi sampela bilong yupela bai tok ah, ol i



no mekim long mi. Tasol yumi save olsem yumi bilong wanpela kantri na sapos ol i mekim long ol Wantok bilong yumi em i olsem ol i mekim long wan wan.

Em tasol mi gat long dispela samting. Sapos husat i pilim wanem samting mi tok i no stret, orait autim long Wantok.

Joe Namuku Gubuli,
Ulupu/Wewak.

Long taun Ambunti misin katolik i gat wanpela stua tasol. Bihain long tok bilong kaunsil, pater i pasim stua. Tasol bihain ol pipel yet i krai na i kros; ol i strong pater i mas opim bek stua.

Mobeta ol kaunsil i no mauswara nating, tasol i bihainim laik bilong ol pipel na i no belhat bilong wanpela kaunsila tasol.

Na nogut ol i giaman na toktok long olgeta planti stua bilong misin taim misin i gat wanpela tasol.

Sausia kaunsil i bin mekim olsem las yia na ol tok giaman bilong ol i go pasim nek bilong ol yet.

- Mi edita

NO BIKHET LONG GOD

Dia Edita.- Mi gat wanpela liklik wari bilong mi.

Long Hailans i gat bikpela trabel, long ol arapela wantok.

Ol i kilim man nabaut long bus na rot tu, na kirapim bikpela pait.

Long wanem ol i no go lotu sampela taim. Ol i stap haiden yet long ples nabaut nabaut na ol i mekim trabel yet.

Dispela bai yumi ken stretim olsem wanem?

Long tingting bilong mi yet mi ting, wokman, bisnisman i soim pasin nogut long ol pipel.

Long wanem wokman na bisnisman i ting long ol samting bilong graun tasol. Em i no go lotu long wanem lotu em i memba long en.

Bilong wanem Misin i no stap long ples bilong yumi? Orait mi ting ol pipel i no inap sindaun gut.

Misin tasol i mekim ol manmeri i sindaun gut na mekim olgeta ples i kamap wanpela pipel tru.

Mi ting Gavman tasol, na Misin i no gat long ples bilong yumi. Orait mi ting ol pipel i no inap sindaun gut long ples.

Olsem na mi ting wokman o bisnisman i no go long Sande i mas go lotu long wanem lotu yu save go long en.

Na askim God long olgeta save na samting yu bin kisim long dispela graun.

No ken bikheth long God Papa bilong yu. Yu stap sotpela de tasol long dispela graun. Na taim yu stap yu mas go lotu na tenkim God long ol dispela samting yu

kisim long dispela graun, na askim God long blesim wok bilong yu. Bai wok bilong yu i ken kamap gut.

Katekis, Simon Komet
Erave/S.H.D.

SENISIM SKUL

Dia Edita.- Mi i wari tumas long ol pikinini i gat 10 na 11 yia i no go long haiskul. Bilong wanem ol i save tok no gat rum long haiskul. Na ol i salim i go long ples na i stap wantaim ol papa na mama. Mi no gut. I moa gut long ol liklik pikinini i mas i stap long skul inap ol i kamap 14, 15 na 16 yia pastaim ol i ken go na stap wantaim papa na mama sapos i no gat rum long haiskul.

Lukim long yia 1971 na 1972 planti ol liklik pikinini i go long ples i stap buskanaka tru, bilong wanem papa na mama i no gat gutpela wok long ol dispela pikinini i mekim. Papa yet i no gat save long mekim gutpela wok long pikinini i lusim skul na kam mekim na sindaun long ples.


Yes, long dispela na mi laik tokaut long dispela lo bilong skul nau ol i putim i stap long pinisim ol liklik pikinini em yia bilong ol 11 na 12 long standet 6 i mas tru long senisim.

Koalisen Gavman i mas lukluk gut tru long dispela lo bilong skul na rausim na senisim kwik tru bai i moa gut tru long ol dispela liklik pikinini em ol i gat 11 na 12 yia i mas tru long kisim save gut bihain ol i ken kisim wok long taim ol i gat 16 na 17 yia bilong ol.

Long mekim dispela mi ting i moa gut tru sapos lo bilong edukesen i mas senis na putim standet 7 na 8 long ol

praimeri skul. Bilong wanem ol pikinini i mas stap inap ol i kisim yia bilong ol long 14 na 15 orait ol gat strong inap long go long vokesenel skul na tu ol i ken go bek long ples long mekim wok wantaim papa na mama.

Paul Kamod,
Madang.



BRATA NA BIRUA

Dia Edita.- Planti pipel i save toktok nau long ol man bilong Goroka ol i bin kilim dai tupela Buka long taim bilong Krismas.

Ol i tok ol dispela man i save kilim dai arapela man ol i no ken kisim kalabus tasol, nogat, ol i mas hangam-apim ol na kilim ol tu.

Mi no laikim dispela kain tok. Nogut yumi kilim ol dispela man na bihain i gat bekim gen.

Blut i save karim blut tasol. Mobeta ol i mas givim ol long bikpela kalabus tru na ol i mas paitim skin bilong ol long ai bilong ol man planti taim. Dispela kain bekim em i gutpela long wanem ol i pilim stret rong bilong ol.

Tasol, nogut ol i paitim skin bilong ol man nogut tasol. Yumi olgeta i mas paitim bel

bilong yumi tu. Long wanem yumi gat rong tu. Yumi save laikim ol brata na ol wantok bilong yumi, tasol sapos lukim man nogut, na birua bilong yumi, bel bilong yumi i hat tumas. Mobeta yumi tanim bel bilong yumi na yumi bihainim stret nupela lo bilong Jisas Kraist. Em i tok, yumi mas laikim ol brata na yumi mas laikim ol birua tu.

Yupela i tingting olsem wanem long dispela tok?

Fr. Herman Janssen, MSC,
Goroka.

NO DAUNIM ARAPELA

Dia Edita.- Mi laik autim liklik wari bilong mi nau.

Sapos yu man o meri o insait long wanpela skul harim na mi lukim, arapela sumatin i laik go antap na i laik daunim arapela.

Mi ting dispela pasin em i no stret tumas. Mi ting yu laik daunim arapela na yu laik go antap, bihain bai yu pundaun.

Na insait long skul yu husat man, tisa o katekis o sumatin, yu no ken kolim arapela i boi. Yu ting wanem?

Ating yu masta na em i boi bilong yu a? Mi ting dispela tok yu kolim boi em i no gutpela tumas. Em i rabis tru.

Yu ting yu inap na yu kolim sumatin i boi orait, yu peim wok yu salim long em.

Sapos yu i no inap orait, yu no ken kolim em i boi.

Kagoboi o wokboi em i orait, tasol sumatin yu no ken kolim em boi. Nogat tru.

Husat man yu laik bekim tok, rait tasol long Wantok Niuspepa.

M.R.Y. Gembogl.

OL YANGPELA MAN I TRABEL

Dia Edita.- Mi laik tokim Mista Michael Mel bilong Mt. Hagen.

Mi bin harim tok bilong em long namba 3 de bilong mun Janueri long ABC.

Mista Michael Mel i bin tok se. Long Hailans em ol man i gat posin bilong tumbuna wantaim bilong waitman dispela ol pipel i save mekim trabel.

Mi yet mi stap long Mt. Hagen, mi winim 8-pela yia pinis.

Olsem na tok bilong Michael Mel i no tru. Bikos olkain trabel i kamap planti taim long Mt. Hagen na long narapela hap bilong Hailans em ol yangpela man yia bilong ol 16-30-na 35 ol i save mekim planti trabel moa.

I no ol man i gat 36 yia, 40 na 50 i mekim trabel.

Mista Michael Mel i bin egensim presiden bilong P.N.G. Tisa Federaisen Asosiesen Mista Bola. Em long dai bilong tupela sinia pablik sevis long han bilong ol man bilong ol man bilong Goroka.

Mi sapotim tok bilong Mista Bola na P.N.G. Nesenel Medikal Ofisa Yunion tu.

Long Hailans em ol yangpela pipel yet, ol i no save bihainim ol lo. Mi no pilip ol lapun man i mekim trabel.

Bill Tokome,
Mt. Hagen.



RAITIM PAS LONG WANTOK

stori bilong tumbuna

KOKONAS IKAMAPWE

Bipo tru wanpela viles i stap klostu long nambis. Ol manmeri ol i wok long gaden, tasol ol i kisim abus long solwara. Ol man yet ol i mekim dispela wok. Olgeta de long moningtaim tru ol i go daun long solwara bilong painim pis. Ol i kisim pislain na huk i go. Ol man ol i hatwok long hukim pis, tasol ol i no hukim planti. Ol i painim wanpela wanpela pis tasol.

Tasol wanpela man i save bringim planti pis i kam long viles olgeta de. Dispela man i gat grile na em i no save wokabaut na wok wantaim ol arapela man bilong hukim pis. Nogat. Olgeta de long moningtaim tru, em yet i kirap i go long nambis bilong painim pis. Em i no karim pislain na huk. Em i no karim banara na supsup. Ol arapela man ol i no lukim wok bilong em, tasol ol i tingting planti olsem: "Dispela grileman em i mekim wanem na oltaim em i painim planti pis, na mipela nogat? Em i saveman tru."

Olsem na ol kaunsil bilong viles ol i kibung. Ol i kibung i stap, na wanpela manki i sanap arere na i harim olgeta tok. Kwiktai em i kisim tingting na em i sanap long ples bilong ol kaunsil na i spik, "Mi ting olsem. Tumora i no tulait yet na bai mi kirap na mi bihainim dispela man. Mi inap luksave long em, tasol em i no ken lukim mi. Mi luksave pinis, orait bihain mi ken

tokim yupela long em i mekim wanem na painim planti pis oltaim."

Ol kaunsil ol i harim dispela tok bilong manki na ol i laikim.

Olsem na i no tulait yet na manki i kirap na wet i stap arere long haus bilong grileman. Orait, grileman i lusim haus na i wokabaut long busrot i go kamap long nambis. Manki i bihainim em, tasol em i no mekim nois liklik. Orait, manki i luksave long olgeta wok dispela man i mekim.

Em i slipim bilum bilong en long wesana. Orait, em i sanap na i holim het bilong en long tupela han. Em i pulim strong het bilong en i go antap. Orait, het i lus na nau i stap long han bilong man.

Man i slipim het klostu long bilum long wesana em i wokabaut i go long solwara. Em i go insait inap solwara klostu i karamapim bodi bilong em. Orait, nau man i subim nek bilong en i go aninit long wara. Kwiktai tumas planti pis moa ol i swim i go insait long nek bilong dispela grileman.

Man i pulap long pis pinis na em i wokabaut isi isi i kam bek long nambis. Em i meknais long bodi bilong en na i trautim ol pis long wesana. Trautim pis pinis, nau man i kisim het bilong en long waisan, na em i putim i go bek antap long nek bilong en.

Tasol manki i no wet moa. Em i luksave long olgeta pasin bilong

grileman, na em i ran i go bek long busrot na i kam kamap long viles.

Long apinun ol kaunsil ol i kisim dispela manki i go long haus man bilong harim stori bilong em. Ol i tok, "Orait, grileman em i mekim wanem?" Nau manki i toksave long ol long pasin man i bin mekim long moningtaim. Na ol kaunsil ol i kirap nogut na ol i tok, "Dispela man i mekim rong. Yumi mas bekim rong bilong em."

Olsem na i no tulait yet na ol kaunsil ol i bihainim grileman long busrot bilong en. Ol i wet na ol i was long em. Orait, dispela man i sanap long waisan na i rausim het bilong en. Em i slipim het long wesana em i go insait long solwara.

Nau wanpela man i ran i go kwik na i kisim het bilong grileman. Em i tromoi het i go long bus.

Bihain, dispela grileman i kam bek long nambis na i meknais na i kapsaitim olgeta pis long wesana. Em i laik putim het bilong en gen, tasol em i no painim. Em i wokabaut long han lek, tasol em i no painim het bilong en. Olsem na em i sanap gen ran i go bek kwik long solwara na em i senis na i kamap pis. Em i swim i go, na grile bilong man i senis na i

kamap grile bilong pis.

Tasol sampela de i lus, na manki i go long hap nambis dispela man oltaim i bin i go long en. Manki i tingting tumas long het bilong dispela man. Em i ting mipela i no planim het bilong dispela man. Em i asua bilong mipela.

Em i laik painim het na planim. Tasol long ples man i tromoi het, wanpela nupela kain diwai i kamap. Na prut bilong em i bikpela moa, olsem het bilong man. Manki i kisim wanpela naip na em i rausim skin bilong prut. Na em i painim pes bilong man. Em i brukim prut moa long naip na em i painim gutpela wara bilong dring na gutpela kaikai tu.

Olsem tasol kokonas i kamap long yumi man. Taim yu rausim skin bilong kokonas long naip, yu inap painim pes bilong man.


Ol tumbuna ol i stori olsem.

Dispela naispela stori i kam long wanpela gutpela buk moa, nem bilong en: KISIM SAVE MOA, BUK 2. Em i gutpela moa bilong ol tisa i ken yusim long painim planti stori bilong tumbuna.

Yu ken baim dispela buk long Kristen Buk Senta long Madang, Lae Wewak, Goroka, Rabaul.



SWIT MOA!




Dispela marasin bilong klinim tis, ol i kolim long "COLGATE". Smel bilong em i swit moa yet. COLGATE i nap long rausim ol liklik pipia bilong kaikai i pas long tis bilong yu. I klinim tu retpela pipia bilong buai long tis.

Sopos yu usim COLGATE bilong klinim tis bilong yu long olgeta dei, bai tis bilong yu i stap klin oltaim.

Yu nap painim dispela marasin COLGATE bilong klinim tis long planti stua long hap yu stap. Em i gutpela marasin tru bilong lukautim oltaim tis bilong yu.


Sopos yu go long stua yu askim long COLGATE marasin bilong klinim tis.

KAUNSIIL GIVIM \$300



Mis R. Doolan i putim mak long ol sampela nupela buk i kam long Australia. Kundiawa Lokal Gavman Kaunsil i bin givim \$300 dola long haus buk bilong Kundiawa na i baim ol dispela buk. Presidèn bilong Kundiawa Lokal Gavman Kaunsil Mista Nogai Kora i sanap insait long haus buk o laibreri wantaim ol sumatin. Ol i amamas moa.

NUPELA MASIN BILONG WOKIM SAKSAK



Nau em i isi tru long ol man bilong ol ples i gat saksak.....
Nau ol ples i ken bung na baim wanpela masin bilong wokim saksak...
Nau yu ken wok bisnis wantaim saksak.....

*yu raitim pas
tasol na askim
long*

KIWI INDUSTRIES, P.O. BOX 1116, LAE

Yu ken askim tu long:
KEREMA LOKAL GAVMAN KAUNSIIL
na
SEPIK COASTAL AGENCIES, WEWAK

Baim masin bilong Papua Nu Gini stret....



Ol sumatin bilong Kundiawa long Chimbu Distrik i stâp insait long haus buk. Ol i kisim ol buk na ritim.

PLANIM KAUKAU LONG LAGAIP

Long hap bilong Lagaip long Westen Hailans Distrik ol i ken planim kaukau.

Long wanpela miting bilong Enga Developmen Komiti, komiti memba Edward Dickie i tokim miting olsem, dispela i ken holim bek \$1 million na i no inap lusim long olgeta yia. Long wanem kantri i save lusim \$1 milion long baim kaukau long Australia.

Mista Dickie i tok kaukau i ken kamapim 10,000,000 paun o hevi bilong em long olgeta yia. Dispela kaukau i ken helpim ol pipel i laik kaikai kaukau long dispela kantri.

Enga Developmen Komiti i helpim long mekim kamapim wanpela kampani long planim kaukau.

Komiti i askim tu Namba Wan Minista Mista Michael Somare, long kisim help long gavman.

Mista Dickie i tok, helpim bilong gavman i ken kam long dispela taim na wokim rot namel long Laiagam na Wabag, na stua bilong putim ol kaukau na maket tu.

Em i tok, Dipatmen bilong Didiman i ken helpim tu long dispela wok, na luksave olsem gutpela kaukau tasol ol i planim.

Arapela memba komiti Mista Ronald Freund i tok, nau ol kaukau bilong Lagaip ol i bin salim long balus long Wewak, na Madang. Tasol pe bilong baim balus i antap moa.

Sapos i bin gat gutpela rot klostu long ol hap graun kaukau i stap long en, bai ka i ken karim ol kaukau long Lae. Olsem sip i ken karim i go long ol arapela hap bilong Papua Nu Gini.

MERI OFISA

Komuniti Developmen Ofisa i wok wantaim Dipatmen bilong Sosal Developmen na Hom Afers i bin lusim Kerema na i kam long Lae.

Mis Lavah Tinggai i bilong Rabaul long Is Nu Briten Distrik.

Em i bin kisim nupela wok bilong em long stat bilong wik i go pinis.

Mis Tinggai i bin wok long Goroka, Madang, Kar Kar Ailan, Port Moresby, na Kerema bipo.

KOPRATIF SOSAITI LAIKIM BIKROT

Kopratif hia i laikim wanpela bikrot long Finschhafen i go long Sialum, Wasu Patrol Pos na i go kamap long Kabwum Sab Distrik long Morobe Distrik.

Dispela rot bai i ken helpim ol pipel moa long ol wok bilong ol.

Ol memba bilong dispela kopratif i bin bung long Finschhafen long dispela wik na toktok long dispela samting.

Seketeri bilong Modele Kopratif Sosaiti, Mista Zeebang Fifuyu, M.B.E. i bin tok, gavman i no luksave long dispela hatwok ol pipel bilong Finschhafen i save mekim.

Ol pipel i hatwok tru long karim ol bek kopi bilong ol na arapela samting i go na salim ol. Ol pipel i salim ol samting bilong ol long balus na i kostim moa mani long baim balus.

Na ol tu i kisim liklik pe tumas long hatwok bilong ol.

Olsem nau ol pipel i bin senisim wok bisnis gen. Ol i lukautim bulmakau olsem bulmakau i ken wokabaut long rot i go long ples bilong salim, na kokonas, kaka kopi ol pipel yet i save karim.

Mista Fifuya i tok inap 20 yia ol pipel bilong Finschhafen i wokhat long ol bisnis long painim gutpela sindaun bilong ol. Bihain long yia 1966, planti pipel i lusim ples bilong ol na go painim wok long ol bikpela taun. Bilong painim mani.

Planti long ol dispela pipel i no painim wok na stap raun nating long taun. Em i no rong bilong ol pipel, em i rong bilong gavman yet.

Mista Fifuyu i askim olsem i mas i gat rot i

kamap. Stat long Finschhafen i go long Pindu, Sialum, Wasu, na i go kamap long Kabwum.

NO BAIM KOPI I GAT SKIN

Moa long 500 lida i makim olgeta sab distrik i mekim wanpela miting long Korefeigu long Goroka Sab Distrik.

Ol i bin tok, long bipo ol i save salim tupela kain kopi. Kopi

i gat skin na i no gat skin long en. Long dispela asua kopi i gat skin i daunim prais long man i salim kopi..

Mista Sabumei Kofikai i singautim Rijonal memba bilong Isten Hailans, Mista Barry Holloway, na memba bilong Goroka Open Mista Akepa Miakwe. ol i mas mekim tok hait long arapela miting bilong Haus. Em i olsem, i mas stapim ol man i save baim kopi i no mas baim kopi i gat skin.

Tupela memba i bin tok bai ol i mas toktok long dispela samting long Haus Asembli hariap tru.

WINIM \$5 PINIS

Moses Marego

C/- Joseph Walamien Bogia.

Catholic High School,
C.M. Malala.

P.O. Alexishafen,
Madang District.

Lukim las pes bai yu
tu inap win.



Mipela helpim kantri asde tude tumora


Ol balus bilong mipela i save flai moa long 200 taim long wik.

Mipela i gat sampela pailot i bin draivim balus inap 18,000 aua.

Mipela save flai i go long 40 ples balus insait long olgeta hap bilong Papua Nu Gini.

Olsem tasol, mipela i pilim mipela i save moa long flai long Papua Nu Gini.

Na wanem, em i ples tru bilong mipela Ansett.





Serving the country-yesterday, today & tomorrow



ANSETT AIRLINES OF PAPUA NEW GUINEA

in conjunction with ANSETT AIRLINES OF AUSTRALIA

AP112



Wanpela yangpela skulboi bilong Aupik skul long Is Sepik Distrik i bihainim bilas bilong ol tumbuna. Edukesen Dipatmen i makim wanpela de bilong wil bilong lainim olkain wok bilong ol tumbuna olsem bilong wokim sospen, kaving, bilas, kundu, musik, na singsing.

Ol sumatin bilong Bainyik Vokesenel Skul i save prinim olkain mak na bilas na piksa na pes long ol laplap.

Ol boi bilong Kreer Praimeri Skul i kisim save pinis na nau ol yet inap long bilasim ol banis bilong skul.

Ol yangpela meri bilong Kunjigini Skul i amamas long wokim bilum long taim bilong skul yet.

Ol skulboi bilong Kunjigini i skul long wokim ol pes giaman bilong karamapim pes bilong ol yet long taim bilong singsing. Ol bikman bilong ples i kamap skulim ol. Sori, i gat planti boi na meri long ol taun i lusim olgeta ting na save long dispela kain bilas.



YUMI NO LUSIM BILAS TUMBUNA

Long raithan yumi lukim wanpela sumatin i lukim gut tru wanpela tumbuan ol lapun bilong ples i bin givim long Aupik Praimeri Skul. Ol lapun i save skulim ol tu long ol pasin na samting bilong bipo bai ol i ken amamas long ol samting bilong Papua Nu Gini stret.


Long lephan yumi lukim ol lapun bilong ples i sindaun na i stori. Wanpela i toktok na i autim stori bilong ol tumbuna na sampela tisa bilong Aupik Praimeri Skul i katim daun tok bilong em long teprikoda, Bihain ol skulmanki i ken harim gen dispela stori long taim bilong skul.

Long ples Kunjigini ol skulboi i lainim pasin bilong wokim basket bilong kalabusim ol pis. Sampela taim ol boi na meri i save go long ples na kisim skul long ol papamama bilong ol yet. Sampela taim tu ol papamama yet i kam long skul na i tis na i wok wantaim ol tisa.

Em hia wanpela banis bilong Kreer Praimeri Skul long Wak, Ol sumatin yet i bin penim ol dispela pes long banis. Olgeta haus skul bilong dispela skul i gat kain pes long ol banis bilong ol, Ol sumatin i kisim aidia bilong olkain pes long viles na ples bilong ol yet.



PES BILONG OL MERI



Ol tripela meri hia i bilong hap bilong Papua i sanap klostu long Port Moresby ples balus,

I no longtaim 8-pela skaut meri bilong Papua Nu Gini i bin lusim Port Moresby na go long Nu Silan (New Zealand). Ol 8-pela meri hia i bin kam bek pinis long Papua Nu Gini.

Ol i bin lainim planti samting moa, long taim ol i bin stap long konprens long Nu Silan.

Kirap long lephan: Mis Pamela Tabua bilong hap bilong Daru, Mis Ara Alu, bilong hap bilong Port Moresby. Ol arapela 5-pela meri i no stap long dispela poto. Olsem i no gat nem bilong ol i bin stap. I bin gat 8-pela Papua Nu Gini meri i bin go stap long dispela konprens. Na olsem ol 8-pela meri tasol i kamap long poto.

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

Nau yu ken baim dispela buk:

Sotpela Lotu Bilong Helpim Yumi, Bük 3

Dispela buk i gat 65 sotpela lotu bilong sampela tok i stap long Nupela Testamen. Sampela tisa i wokim planti gutpela tok bilong skul na famili na kongrigesen.

Salim oda i go long:



KRISTEN PRES

Sales Division
The Christian Book Centre
Box 222, Madang




Namba tu kiap bilong Morobe Distrik, Mista Gordon Smith i opim wanpela pilai resis long Milfordhaven Klap bilong ol meri long Morobe Distrik. Ol meri hia i amamas tru na singsing.

papua nu gini wok wantaim

Poto i stap aninit tru i soim Mis Patty Walo i laik putim maus bilong em long maus bilong Mis Barbara Mairia, na em i winim win i go insait long em. Bai em i ken kisim win gen.

Poto i stap namel i soim Mis Patty Walo i sevim laip bilong Mis Barbara Mairia long wanpela giaman bagarap long wara.


Ol dispela meri i skul long sevim laip bilong ol arapela man long taim ol i kisim bagarap long wara. Olsem nau yu ken lukim ol i wok long mekim dispela trening bilong ol.



vokesenel skul



Poto i soim Badili Vokesenel Senta long Koki Market long Port Moresby. Ol lain sumatin hia i wokim 7-pela raun haus. Em hia, Gabi Vaira na Harina Iamoe i putim simen rup antap long wanpela long ol 7-pela haus. Ol sumatin i kisim diwai samting long bus yet na wokim ol dispela lain haus. Ol sumatin i ting olsem dispela ol wok hia klostu bai i pinis. Ol i putim namba tu rup simen antap long dispela haus.



Ol sumatin hia em long, Kageni Kohota, Hoe Lavai Borebe Momo, na Stephen Ammopa. Ol dispela sumatin hia i katim ol diwai long so na i laik wokim haus. Ol sumatin hia i soim olsem ol i laikim tru long mekim ol dispela wok.



Em hia:

Mista Nelson P. Aingras

Em hia:

(o Mista Mosong)

Maski wasket bilong yu i gat gras ain o gras mosong. Yu sev tasol wantaim **BLUPELA GILLETTE KAPARESA**, na olgeta de skin bilong pes bilong yu i bai kamap malumalu tru - Em kain pes hia ol meri i laikim moa moa yet

BLUPELA GILLETTE KAPARESA

Wanpela wanpela paus i gat 5 pela kaparesa i strong moa na i sap tumas ...

planti skin pukpuk

Rural Developmen Ofi-
sa Mista Ian Pendergast
long Westen Distrik i
bin tok, long yia 1972
moa long 45,153 ol skin
bilong pukpuk ol i bin
salim. Na long 1971 i
gat 21,135 tasol.

Em i tok taim bilong
draipela san long Papua
i olsem gutpela taim
bilong lukautim pukpuk.

Long Papua ol i bin
salim, 8,204 long 1971
na 32,500 long 1972.

Long Nu Briten ol i
bin salim skin bilong
pukpuk inap long 1,213
long 1972 na long 1971
ol i bin salim 674 ta-
sol.

Long Nu Gini bikples
wok bilong lukautim ol
skin pukpuk i pundaun
liklik olsem long 1971
inap 12,257 na long las
yia inap 11,440 skin
tasol.



Namba wan Minista bilong yumi Papua Nu Gini Mista Michael Somare i laik kisim nupela pikinini meri Dalciana long han bilong meri bilong em, Veronica. Em i amamas moa, long wanem em i gat nau 2-pela pikinini meri na 3-pela pikinini man. Meri bilong Mista Michael Somare i karim Dalciana long Port Moresby, long namba tu de long mun Februeri long dispela yia 1973.

OLGETA DE OLGETA MANMERI I
MAS WASWAS WANTAIM SMELSOP,
NEM BILONG EM LUX.



WASIM PES BILONG YU LONG LUX.
PILIM NAU EM I KAMAP KLIN TRU.



TAIM YU WASWAS, YU YUSIM LUX
TASOL. OLABOI, NAU YU PILIM
KLIN TRU. SKIN I LAIT MOA.



SANDA BILONG SMELSOP LUX I PAS
I STAP LONG BODI BILONG YU NAU.



LUX EM I NAMBA WAN SOP BILONG
WASIM OL PIKININI TU.



SAPOS YU LAIKIM BODI I STAP
KLIN NA I GAT GUTPELA SMEL, YU
WASWAS LONG SMELSOP LUX TASOL.
YU GO, BAIM LUX TUDE.



EZ1085

NAMBA TU DIREKTA

Pablik Sevis Bot i makim pinis Mista Aisea Taviai olsem namba tu direkta bilong Dipatmen bilong graun na na ol samting i stap aninit long graun. (Lands Surveys and Mines).

Mista Taviai i kam long Kokopo Sab Distrik na i bin wok olsem tisa long Madang long 1959.

Long 1968 inap 1969, Mista Taviai i stap skul long Yunivesiti bilong Hawaii. Long yia 1971 em i bin kamap olsem memba bilong Pablik Sevis Bot.

OL PIPEL BUN NATING

Wanpela patrol bot bilong painim pis bilong Dipatmen bilong Didiman long Madang i helpim ol pipel long pis.

Ol pipel bilong Bili-

au Viles long hap bilong Saidor long Madang Distrik. Ol i sot tru long kaikai, na ol i kaikai banana na kokon-as tasol.

Bot Dum Dum i save kisim 500 paun hevi bilong pis na i givim i go long 80 pipel i sot long kaikai. Long wanem draipela san.

Ofisa bilong didiman long Madang i salim tok long Bot Dum Dum long helpim ol dispela pipel long pis.

Mr. Malai Chanilou i tok, 4-pela kru i lusim bot na i lusim wan wik long painim pis long ol dispela lain pipel. Em i tok ol lain man hia i bun nating tru.

BUNGIM \$69,273


Lae Taun Kaunsil Mista Biltris i bin tok, i go inap long Janueri, 22 de, Lae Taun Kaunsil i bungim \$69,273 bilong takis long graun.

kardinal kam long hailans



Long 8 de bilong Februeri Kardinal Karol Wojtyla wantaim Bisop S. Wesoly na Pater S. Dziwisz i kam long Nu Gini long lukim ol wantok bilong ol. Krakow em i as ples bilong Kardinal Wojtyla. Dispela ples i stap long kantri ol i kolim Poland. Kardinal i amamas taim em i lukim 14 misinari bilong Poland i save wok long 4-pela dai-osis long Papua Nu Gini. Kardinal Wojtyla, Bisop Wesoly na Pater Dziwisz i stap tupela de long Goroka, na bihain ol i go long Australia long wanpela bikpela kibung na beten ol i kolim Kongres bilong Oikaristia.

Yu no gat lektrik? Maski, samting nating. Kisim tasol dispela lam kerasin: PETROMAX. Em i win tru, i lait olsem san.




ORIGINAL
Petromax
MADE IN GERMANY




TOYO

TOYO taia i nambawan tru bilong olkain ka, trak, bas.



Yu laik ol poto bilong yu i kamap klia na kala bilong ol i lait tru? Putim AGFA film insait long kamera bilong yu.


DOLMAR so inap long mekim wok bilong tenpela man. Yu malolo; em i wok.



BRECKWOLDT & CO. (NG) PTY. LTD.


PORT MORESBY · MADANG · RABAU
LAE · MT. HAGEN · WEWAK · KIETA

SAVE LONG OL MEMBA



MISTA NOMEI PANGIAL
(Mendi Open)

AS PLES: Mulim.
OL KRISMAS: 42
SKUL: Em i no bin go long skul.
WOK: Plisman bilong ples inap 5 yia. Em i fama na i save salim ol samting long maket. I gat banis bulmakau. Long yia 1962, em i kamap presiden bilong Mendi Lokal Gavman Kaunsil.
LUKIM PINIS: Lukim pinis Australia, na stadi long ol lo na politik.
MARIT: Marit na i gat 3-pela pikinini.




MISTA PHILIP BUSENG
(Markham Open)

AS PLES: Bagabua
OL KRISMAS: 32
LOTU: Luteran.
SKUL: Winim standet i tasol na go long medikal skul inap 2-pela yia. Bihain kamap medikal odeli na em i wok long bikpela haus sik long Law inap 3-pela yia. Em i komiti memba bilong wanpela klap long Lae, na presiden bilong Markham Welfe Sosaiti long Taun bilong Lae.
FAMILI: Marit i gat 6-pela pikinini, na bihain meri bilong em i dai.



MISTA MANNASEH VOETO
(Menyamy Open)

AS PLES: Aseki
OL KRISMAS: 26
LOTU: Luteran
SKUL: Em i winim Fom 1 long Gelem Haiskul, bihain em i go long Awelkon Seminari long Siassi Ailan. Na kamap olsem wanpela pasto bilong Luteran Misin long yia 1968.
WOK: Direkta bilong Menyamy Sai Watut Rural Progres Sosaiti. Na presiden bilong sampela lain.
FAMILI: Em i marit na i gat tupela pikinini.



MISTA PITA LUS
(Maprik Open)

AS PLES: Lehenga
OL KRISMAS: 36
LOTU: Saut Sis Evanseliken Misin (S.S.E.M.)
SKUL: Winim standet 4 tasol.
WOK: Fama na bisnisman, bihain em i go long Nevi long Manus. Yia 1964 em i kamap memba bilong Haus Asembli. Na tu em i bin stap katekis bilong S.S.E.M. Misin. Na em i presiden bilong Maprik Soka Asosiesen.
LUKIM PINIS: Australia na Japan.
FAMILI: Em i marit na i gat tupela pikinini.

kaunsil nius


NUPELA KAUNSIKA

Bai i gat nupela Lokal Gavman Kaunsil ol i kolim Yelia. Em i long Isten Hailans.

Em i kamap olsem. Ol tultul luluai na hetman bilong ol long Wonenara Sap-Distrik i kibung wantaim Lokal Gavman O-

fisa, Mista W.F. Wadsworth, na i laik bai ol i bungim hap bilong Aziana, Wugumwa, Kuwapu na Yelia na i wokim nupela lokal gavman kaunsil i gat nem Yelia.

Nem hia ol i kisim long bikpela maunten tumas klostu long ol, em Yelia tasol.



MISTA BONA AZANTFA

PRESIDEN NO LAIK MOA

Long Henganofi Lokal Gavman Kaunsil long Isten Hailans, presiden yet i no laik holim moa wok bilong em. Em i Mista Sunuku Krokio.

Em yet em i wanpela et pos odeli na em i tok em i no inap holim tupela wok wantaim. Em i laikim moa wok bilong doktaboi.

Ol i bin ilekim Mista Bono Azanifa, em i wanpela bisnisman bilong Henganofi na bipo em i memba bilong Haus Asembli.

Long Isten Hailans nau ol i gat ileksen bilong 50 wot bilong Lufa Lokal Gavman Kaunsil na bihain liklik i gat ileksen bilong 46 wot bilong Okapa Lokal Gavman Kaunsil.

NUPELA ADIA

Long hap bilong Mt. Hagen ol kaunsila nau i orait long bekim bek hap takis mani ol pipel i bin givim, bai ol pipel yet i ken yusim bilong kirapim wanpela wok ol yet i laikim long hap bilong ol.

Olsem ples Wurup i bin kisim bek wan tausen dola (\$1000) bilong statim wanpela komyuniti senta. I olsem wanpela bikpela haus bilong ol miting na skul bilong ol bikpela manmeri na bilong danis na spot na bilong soim piksa.

Bai tu i gat wanpela woksap bilong sapim olkain kaving na salim.

Ol pipel yet i bin bungim narapela \$140 na ol i hop Developmen Beng bai helpim ol.

Ol kaunsila i ting dispela em i wanpela pasin bilong pasim ol yangpela manmeri long ples

Wantok Publications bilong Wewak (P.O.Box 369) i wokim, na Wirui Pres long Wewak i prinim.



KOMATSU

KOMATSU'S D85A Crawler Tractor featuring Cummins NH220 Diesel engine at work on the Daulo Pass, Eastern Highlands

the power and strength for Papua New Guinea

Parts and after sales service for KOMATSU Crawler Tractors and Track Loaders is provided by TUTT BRYANT PACIFIC LIMITED throughout Papua New Guinea and The British Solomons. Write for further details on how KOMATSU can help you in Papua New Guinea



Tutu Bryant Pacific Limited

LAE-MADANG-PORT MORESBY-GOROKA-RABAU-KIETA

PAINIM 5 DOLA HIA

OL LO BILONG WIN

Painim wanem samting i stap insait long piksa. Pastaim yu ritim tok aninit long piksa bilong painimaut wanem samting i hait na yu mas painim. Bilong painim yu mas tanim tanim piksa nabaut nabaut.

Kisim pensil na raunim dispela samting yu bin painim long piksa, bai mipela i ken lukim yu bin painim tru o nogat.

Hariap, mipela i mas kisim bek piksa insait long wan mun. Mun i stat long de yu lukim daunbilo long olgeta pes bilong dispela niuspepa.

Nau salim piksa wantaim nem na adres bilong yu i kam long :

PIKSA
BOX 396
WEWAK

437

Pepa bilong olgeta manmeri i givim stretpela tokbek bai i go insait long wanpela basket. Bihain wanpela pikinini i pulim wanpela piksa i kam antap. Sapos em i bilong yu, orait, yu winim 5 dola (\$5.00).

Em tasol. Yu traim. Em i isi moa.



Yu gat gutpela ai? I gat tupela man i stap insait long dispela piksa. Papa i singautim pikinini na pikinini i ran i kam long rot. Tanim tanim piksa na painim papa. Painim pinis, salim i kam na yu inap winim \$5 dola. Hariap. Traim

Nem bilong yu:

Adres:

.....

Sapos yu stap long skul o long kaunsil o long wanpela klap, mobeta yupela kisim planti WANTOK i kam olgeta taim. Sapos yupela kisim 10-pela o moa, bai prais i daun tru. Yu rait na askim mipela tasol.

Hia nau yu raitim :

Nem:

Adres :

.....

Mi laikim pepa i kam olgeta taim
Salim i kam long :

WANTOK - P.O. BOX 396 - WEWAK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem:

Adres:

.....

Salim i kam long :

WANTOK - P.O. BOX 396 - WEWAK

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.